

# Колхозсянь — Москвао

Луздор районса Абъячайысь Дмитрий Смолев снимайтчо киноын да ворсё Москвава «Современник» театрын.

Кольом вежонё миян нималана земляк петкөдчис Виктор Савин нима драмтеатрын. «Кодзула висьомыс» Дмитрийос абу на топөдөма, да важ төдсаяс моз и варовитим.

## Енбиа вильыш поз

—Ме комион баита, — луздорса моз и шыасис Дмитрий. — Коми кывйыд меным весиг Москваын отсаліс. «Деревенский анекдот» фильм-спектакльын ворсі шөр рольсё. Режиссёрыс вөлі мөвпалё, кызди кутасны варовитны постановкаса геройяс, украинаса али ростовса моз. Ме и вөзйи, мися, гашкё, коми ног. Дерт, спектакльын коми кыв оз юргы, но сідз шусяна акцентыс миян.

**—Лоны актёрён — тайё челядьдырся көсйём?**

—Дерт жё! Ставыс самодеятельносьтсаян и заводитчис. Мам висьтавліс, детсадйын кө пö шуасны ичөт кывбур лыддыны либө сетасны нейджыд роль, зэв ёна ыждада, ворсны сэтшөм окога да.

А школаын велөдчи лёка, «два» вылө, нөшта и вильышаси. Сэсся 9-өд класс помалөм бөрын дасөдас эз и босьтны. Тайё збыль, да ог и соссыы.

Но дум-көсйөмсө колө вөлөм збыльмөдны. И вөчөма та могысь медводдза воськов: пырөма велөдчыны В.Т.Чисталёв нима культура колледжө. Педагогьяслы «сөстөм видзөдласа вильышпозйыд» өдйө и мусмөма. Велөдысь Надежда Изюмскаякөд Дима дасьтөма программа да мунөма, кызд шуласны, Москва пөкөритны.

## Батялөн борд улын

—Позьё шуны, колхозсянь веськалі ыджыд карө, — водзё висьталё Смолев. — Помалі ГИТИС. Дипломной спектакль видзөдны локтис Павел Каплевич (Россияса художник, театрса да киноса продюсер). Казялөма менө да вөзйис петкөдчыны Галина Борисовна Волчеклы («Современник» театрын художественной веськөдлысь). Ачыс и сёрнитчис аддзысьлөм йывсьыс. Ме лыдди кык монолог. Ёна майшаси, мися, вермасны и не босьтны. Но шогми! Пыр жө веськалі Батялөн борд улө (Дмитрий тазди шуө РФ-са народной артист Сергей Гармашёс).

**—Сэтшөма «рөдняясянныд» Сергей Гармашкөд?**

—Сергей Леонидович зэв бур морт, ыджыдджык ёрт. Ёна отсалө быд ногыс. Оз сідзтадз кывнас печлась, шуас — вөчас. Сергей Леонидович да Галина Борисовна — менам мөд бать-мам.

**—Дмитрий, тэ сөмын «Современникын» ворсан али мукөд театрын тиөтши?**

—Вөлі сэтшөмыс. Нина Чусова (артистка, режиссёр) вөзйис меным, Паша Деревянколы, Саша Яценколы (театрын да киноын ворсысьяс) уджыштны мөд театрын. Ог висьтав нимсө да коді сәні веськөдліс. Сөмын тайё вөлі зэв озыр мортлөн көсйөм. Тыдалө, тазди сйө окогасө тешитөма. Уджыс пансьыліс эськө. Спектакль кежлө паськөмсө



миянлы вурліс ачыс Пьер Карден. Но сэсся ставыс помасис. Весиг ог төд, көні өні сйө да мый вөчө.

## А мыйла «звездитнысө»?

**—Тэ тиөкыда и киноын снимайтчан. Көні тэныд ёнджыка воө сьөлөм вылад?**

—Кино — тайё, позьё шуны, производство: би, шы, монтаж. А театрыд — магия, кутшөмкө мистика.

**—Тэ сьуеверной жө?**

—Абу. Ме Енлы эска. Шуам, текст кө усьё джоджө, кыпөда да водзё лыддя. А мукөдыс меным горзөны: «Тэ мый вөчан! Колө жө сы вылө пуксьывны!». Сөрөм тайё ставыс.

**—Дмитрий, видзөдны кө, мыйта киноын тэ снимайтчин, спектакльын ворсін, тэныд везитө. Эмөсь сідз шусяна мөд плана да шөр рольяс, уна сикас амплуаын асьтө видлөмыд и. Дерт, туй вылын тэно йөзис төдмалөны, поклонникьясыд, гашкө, «чашйөны»? Кылан асьтө «кодзулөн»?**

—Некод на эз чашйыв, Енмыс видзис. Дерт, корөны кырымасыны либө отлаын снимайтчыны. Нимкодь, дерт. Но ме көсья уличаті да метроын повтөг ветлыны. А мыйла «звездитнысө»?

Кодсюрөлөн татшөмыс овлө. Шуам, менам ёрт Артур Смольянинов «9 рота» киноын снимайтчөм бөрын вөлі висьталө, юрой пө дзикөдз бергөдчис. Но сэсся асьсө кутөма, гөгөрвоөма, мый ышнясьөмысь төлкыс абу.

**—А тэнад эм роль, кодысь яндысян?**

—Татшөмсө быд артист вермас казьтыштны. Шуам, менам — «Адъютанты любви» сериалын, көні картёжникөс ворсі.

**—Унакөд нин сёрнитлі да, висьталөны, овлө пө сьөкыд ворсны сйө либө мөд геройөс. Колө пө ёна мырсьыны, мед ку пиас пырны...**

—Тайё сөрөм жө. Ставсө позьё ворсны, енбиа кө. Вермас лоны сөмын, оз сйөс вөзйыны, мый көсьян тэ. Дерт, тайё менам видзөдлас. Кора прөща ошйысьөмысь, но ме ачымөс лыддя енбиаөн.

А овлө и сідз, мый сэсся артистыс персонаж кусьыс бөрсө петны некызд оз вермы. Төда жө татшөмьяссө. Страк весиг! Но накод мед врачьяс нин ноксьөны...

**Сёрнитіс Екатерина МАКАРОВА. Снимокьясыс өтувезйысь.**

